

In dialog ei buca in monolog

En connex cul simposi Stad da Glion, igl «Ilanzer Sommer 2024» ch'ei staus ils davos gis, han divers ateliers envidau da reflectar e discutir da tematicas conformas. En in da quels ha la presidenta dil Forum per la pasch, Lea Suter, presentau ina fuorma da discuorer denter carstgauns cun diversas opiniuns.

AUGUSTIN BEELI/FMR

Nua che carstgauns partan la convivenza, dat ei era controversas. Tgi preferescha blau e tgi odiescha blau, tgi ha la posiziun dretga e tgi la seniastra, ins sefixescha sin alv ni ner. Sligaziuns surlaian ins pli e pli savens a dertgiras, lezzas decidan, tgi che ha raschun e tgi buc. Quei sa semanifestar en famiglia, politica, societad, cultura, religiun ed auters secturs. «La tecnica che nus havein sviluppuau duei cumbatter posiziuns polarisontas ed aspects d'inimitg. Finamira da quei format eis ei da rinforzar il spért da cuminonza», ha Lea Suter declarau. Vendergis endamaun ha la presidenta dil Forum per la pasch e confundatura dalla Stad da Glion presentau ad ina gruppa da persunas interessadas in impuls pratic da tschintschar in cun l'auter.

Eis ei in da 9 ni in da 6?

Gl'atelier ha giu il tetel «Dalla carplina tiel dialog – co nus vegnin, en temps polarisonts, in cun l'auter el discuors». Per entschiever ha la menadra supplicau la gruppa da numnar, da tgei ch'in dialog consisti. La rimnada ha ella scret sin pupials e fermu vid la preit: capientscha vicedeivla, equivalenza, sill'altezia dils egl, empatia e simpatia, aviartadad, sinceradad, mo era cunfins.

Menar in dialog seigi in art ch'ins duessi adina tgirar, dalla famiglia tochen sin plaun internaziunal. Savens va ei per la damonda, tgi che ha raschun, omisduas vart insistan sin lur posiziun. Lea Suter lavura tier l'organisaziun Pro Futuris, ina instituziun fundada il 2022 cuagl intent da



Duront gl'atelier ha ei tuttavia dau muments da rir.

FOTO AUGUSTIN BEELI

rinforzar la democrazia. Per saver menar in bien dialog drovi las marveglias d'anflar ils motivs da tschella posiziun. Lea Suter ha mussau gl'exempel da duas cefras. Gest tenor co quella ein piazzadas, san ins buca differenziar sch'igl ei 6 ni 9.

«Menar in dialog munta ch'ins lavura comunablamein vid la finamira win-win, e buca vid l'ideologia d'inimitgs e digl inculpar – ni schizun ir ella direcziun cuntraria: lose-lose.» La noziun englesa

munta che omisduas cumbattan in l'auter e crodan ella profunditad.

Exercitar temas polarisonts

Suenter ina introducziun ella tecnica d'emprender a menar dialogs ha la gruppa stuiu far emprems exerciezis d'applicar quella. Duas persunas han mingamai giu da discutir ina damonda spinusa polarisonta. Per exempel sch'ei drovi ina tiarza schlatteina ella Constituziun

sper il feminin e masculin e sche la Confederaziun dueigi metter a disposiziun armas per l'Ucraina. Meinis cuntra-stonts e polarisonts dat ei adina, cunzun ella politica. Duront in'ura e mesa han participontas e participonts saviu exercitar il dialog constructiv cun tedlar e cun empatia per «cunterpartida».

Dapli informaziuns dalla tecnica e moduls da menar dialogs mira www.profuturis.ch.

Menar discuors – sis cussegls

Egl atelier ha Lea Suter repartiun in feigl cun sis puncts che san gidar da menar in discuors constructiv en in ambient schurmegiau.

1. Spetga in amen avon ch'entscheiver. Reflectescha spert, sche ti eis prompts/pronta da tedlar e sche ti has marveglias dalla historia da tiu partenari/tia partenaria.
2. Teidla activamein e resumescha cun tes agens plaids quei che tiu partenari/tia partenaria ha detg – per esser segirs che ti has capiu endretg. Dai adarg da buca formular ordavon tes agens arguments, duront che tschella persuasiva discuora.
3. Buca valetescha all'entschatta tschella posiziun e daco che quella/quel patratga aschia. Emprova d'eruir ils motivs.
4. Communichescha cun quitau, numna tias experienschas personalas e tes basegns. Seigies cunsciencs/cunscienza che tias ideas san muntar enzatgei tut different per tiu partenari/tia partenaria da dialog.
5. Desista da pseudo-harmonia e missiunescha buc. Formulescha tia posiziun claremein. Emprova buca da perschuader tiu partenari/tia partenaria ni da s'adattar a tschella posiziun – per amur dalla harmonia.
6. Capescha e communichescha emozziuns. Sche ti sesentas attacca/attaccada, emprova da comunicar quei enstagl ir ella cunteroffensiva. Emprova d'eruir, tgei effect che tia pretensiun fa a tiu partenari/tia partenaria. Sch'il dialog vegn memia pesonts per tei, damonda in timeout per reflectar ed ordinar ils sentiments.

Il pader curios era marveglius

Da pader Placi a Spescha dat ei publicaziuns, retschercas e biografias. Quei ch'el ha scret han historichers analisau.

Il «pader curios» vala sco il piunier digl alpinissem e turissem grischun. Da quella personalitad ha il romanist Renzo Caduff referiu venderdis sera a Mustér.

AUGUSTIN BEELI/FMR

El mava senza spiegel da sulegl per la pezza. Cun siu fest cun puntga, manti liung, capiala e sacados ei il conventual dalla claustra da Mustér partius numerusas gadas – buca dalla claustra, mochein il pli savens da ses loghens da pastoraziun. L'uniun La Culturella ha organisau venderdis ina sera da referat cul convischin da Mustér Renzo Caduff. Il filolog e romanist ei dapi 2015 incumbensau per litteratura e lungatg romontsch all'Universitad da Geneva e lectur da romontsch all'Universitad da Friburg. Sia domena da retscherca include denter auter era la litteratura dallas Alps. Ils diaris e las notizias da pader Placi a Spescha ein ina dallas fontaunas da quei sectur.

In passadi tras la Greina

In grond auditori ha priu part all'occurrenza ella halla Cons. Quintau haveva La Culturella cun 50 persunas. Ils organisateurs han denton prest constatou ch'ei drova il dubel dallas sutgas semtgadas. Renzo Caduff ha avischinau il publicum ad ina personalitad descreta e tractada en numerus cudischs e lavurs scientificas. La personalitad da pader Placi a Spescha fascinescha ton alpinists sco linguists, etnologs, geologs e geografis. Il famus conventual ei naschiu 1752 ed ei era morts 1833 a Trun. Il referent ha buca presentau el detagl sia prestaziun ch'ins memmorescha actualme in el cantun Glaruna ed er en Surselva: la conquista dil pli ault punct dil massiv dil Tödi, il Péz Russein sin 3612 m.s.m. Igl ei il pli ault punct dalla cadeina dallas Alps glarunesas ed era il pli ault punct dalla vischnauna da Mustér. Pader Placi ha buca dumignau igl 1. da settember 1824



Renzo Caduff duront siu referat ella halla Cons.

FOTO AUGUSTIN BEELI

il Péz Russein. El haveva lu 72 onns ed empruau gia tschun gadas d'ascender quei pli ault punct. Ch'el ha intimau ses dus accompignaders Placi Curschellas ed Augustin Bisquolm da continuar ed ir vivon tochen sisum ha el la finala descret ella descripziun da quella 22avla tura.

Renzo Caduff ha menziunau pliras gadas ch'il Péz Urlaun ei stau la basa da

contonscher il punct pli ault dil massiv, il Péz Russein. El ha legiu e perscrutau las notizias ch'il pader ha fatg dallas turras extendidas ch'el ha fatg e descret en manuscrets. Quellas ein conservadas oz egl archiv dalla claustra da Mustér ed ina viva e reha fontauna dalla situaziun. Il referent ha denter auter mussau ina proposta che pader Placi ha inoltrau 1820

al commissari da vias dil Grischun. Gl'onn 1817 haveva l'erupziun dil vulcan Tambora caschunau in onn senza stad ed onns da fomaz ell'Europa. In project da via sur la Greina haveva il pader viu sco contribuziun per arver la Surselva viers sid.

Reclamaziuns agl uestg

Sper sias atgnas retschercas scientificas ei Renzo Caduff sebasaus en siu referat ill'ediziun da Ursula Schollian Izeti, cumparida 2005 ella casa editura Chronos el cudisch «Entdeckungsreisen am Rhein». Ch'il pader era dapli alpinist e perscrutader che pastur dallas olmas resorta da tut las expediziuns ch'el ha fatg. Pader Placi a Spescha vala sco emprem-ascendider da 22 pézs, naven dil Muraun, Péz Ault, Péz Tgietschen/Oberalpstock, Péz Avat e Péz Urlaun. Il pader benedictin haveva gl'avat tarmess denter auter era sco caplon en Lumnezia. Dil beneficiat da Rumein anora ha el fatg expediziuns sil Péz Aul, Péz Terri, Péz Cavel, Tomül ed il pli ault en quella cuntrada, il Péz Valrein/Adula.

Cun ir siadora e perscrutar dustava il pader sias marveglias dil niev e nunenconuscent. Quei ha el sez concediu en sias notizias. Renzo Caduff ha mussau extracts cun passaschas nua ch'el scriva dalla fascinaziun pils cuolms, ils aults e cunzun pil Russein ed il Tödi. Sias notizias ha el adina fatg en tudestg, il lungatg ch'el haveva applicau duront siu temps da studi a Cuera, el Vnuost ed a Nossadunna. Pervia da sia pissiun pil niev, nunenconuscent e siu regl scientific ei il pastur dallas olmas vegnius savens en conflict d'interess cun ses superiors. Il referent ha menziunau brevs da reclamaziuns ch'el ha anflau egl

Archiv episcopal a Cuera. Ins haveva tgisau e la Selva, ella Val Tujetsch, ch'el vegli dismetter il «Ludaus sei Jesus Cristus» sco salid denter ils vischins. Medemamein vegli el dismetter ils tschun paternos e tschun avemarias sco finiziun dil survetsch divin. Vinavon apprezieschi pader Placi pauc il rusari. Schi pauc, ch'el laschi buca tuccar da rusari, havevan ins rapportau giu Cuera agl uestg.

Pader Placi, il catschadur

Dapi che pader Karl Hager (1913) e pader Iso Müller (1974) han publicau biografias da pader Placi a Spescha, han ils scienziats anflau adina puspei novas vestas dil «pader curios» – aschia era Renzo Caduff. El ha scuviert ch'il pader mavi er a catscha. Sco caplon a Sumvitg raquenta el en in diari ch'el hagi vultu contribuir ad in past adequat ch'ins vuleva survir agl uestg ch'ei vegnius per dar la s. creisma. Pia hagi el priu la buis e seigi ius els aults. Turnaus seigi el la finala cun pauca preda, remarca el ella retrospectiva. El era denton buca turnaus schi prest en casa pervenda. Persuenter ha el ascendiu il Péz Avat. Ord spira liunguriala seigi el ius vivon, avon hagi el magliu in tec «Chocolate» ch'el havevi aunc en sia reserva e seigi ius siado, tochen ch'el haveva contonschiu il péz culla fuorma semeglionta alla capetscha da siu superiu. Alla fin dil referat ei ina cuorta, mo interessanta discussiun sesviluppada pertuccont la ruta exacta che pader Placi haveva elegiu per ascender il Péz Russein. Era ha Renzo Caduff rispundiu la damonda, daco ch'il pader metteva a siu num da famiglia ina gada gl'attribut da noblezia «à» ed ina gada buc. «Ins enconuscha buc il motiv exact», ha Renzo Caduff rispundiu.